

EXPORT DEVELOPMENT IN MIZORAM

*Vanlalpara
Marketing Inspector
C&I (Commerce Wing)*

Kum 1987-a Trade & Commerce Department a lo din khan a hna tura Sorkar-in a pek pawimawh zinga pahnih chu Mizoram hmun hrang hranga Market (Bazar) enkawl leh Ram dang nena insumdawn tawna kawnga hmalak a ni a, chumi kawngah chuan hna nasa takin a lo thawk tawh a, a thawk mek bawk a, amaherawhchu, duhthusam ram erawh chu kan la thleng pha lo hret niin a lang.

Export tih hmasawna atan hian Central Sorkar hian scheme \ha tak mai duan a nei a chu chu- Assistance to States for Developing Export Infrastructure and Allied Activities (ASIDE) a ni. He scheme-ah hian state-in a tum ve ngai loin a zavaiin (100%) central sawrkarin export tih hmasawn nan sum hi a rawn tum a ni, he fund hi a zarzotu state kan ni ve reng bawk a, hemi hmang hian Myanmar ramri leh sumdawnna kalkawng khaw pawimawhah te Export leh Import atana thil \angkai din nan (Infrastructural Development) hman a ni tawh a. Mahse, he sum hmanga hna kan thawh chhoh mek lai hian he scheme hi 2015-16 ah khan an rawn ti tawp ta a, a uiawm tak zet, chung hna la zawh loh tihputlin nan chuan Commerce & Industries Department chuan hma a la chhonzawm mek zel a ni. He ASIDE Scheme a\anga sum hmuh hmanga hnathawh langsar tak chu Zokhawthar-a Land Custom Station din puitlin nan khian \angkai taka hman a lo ni tawh bawk a ni.

He ASIDE bak a\ang pawh hian Export development atan Export Development Fund for North Eastern Region a\angin DPR thehluh Ministry of Commerce & Industry-in a lo thlitfim hnua a lo pawmte chu Export Development atana \angkai ngei tih hriain The Agricultural and Processed Food Products Export Development Authority (APEDA) kal tlangin fund rawn pek a awm nual bawk a, hei hi a zar zotu eng emaw zat an awm tawh a ni, chung zingah chuan Champhai Winery tih phuisuina te, Zopar pvt. company-in an pangpar an tharchhuah leh thawnchhuahna tur atan \anpuina te a lo pe tawh a, Mizoramin a zar a zo ve nual a ni. Heng bakah hian Export Development hmanga hmasawna ruhrel kan thawhte chu-

i) R&D Centre Seling:

He Centre tih puitlin nan hian Ministry of Commerce & Industry chuan \anpuina a rawn pe a, chumi hmang chuan Mizoram Food Processing, Research & Training Centre chu din puitlin a lo ni ta a, he Centre hi May 15, 2017 khan Chief Minister-in a lo hawng

tawh a, tunah hian Food Processing leh Entrepreneurship Development atan training centre pawimawh tak a ni chho ta a, he ram neitu nihna hi Commerce & Industries Department-in a chang a, Private firm-in a enkawl hna an kalpui mek a ni.

ii) Trade Facilitation Centre, Lawngtlai:

Zawlnei \henkhatin an lo hmuh lawk tawh angin Mizoram chhim lam chu sumdawna kawtchhuah ropuiah a chang chho dawn mek a, Myanmar ramchhunga lawngchawlhna hmunpui pakhat Sittwe port chu a pawh turin Kaladan Multi Modal Transit Transport Project hmangin kawngpui laih zawh \ep tawh a ni a, he sumdawna kawngpui hi amah mai chuan awmzia a nei ngawt lo, chumi atan chuan Mizoram Sorkar chuan he kawngpuiin a chhun chiahna hmun chhim tawp Zochachhuah hmunah LCS Zorinpui din turin hma a la mek a, chumi nena inhmurem chiah turin Lawngtlaiah Trade Facilitation Centre din turin bul \an a ni tawh a. EDF a\anga sum hmuh 1st instalment hmangin building Block A sak zawh a ni tawh a, 2nd instalment lo kal leh mai tur hmangin Block B leh staff quarters te sak chhunzawm leh tur a ni ang. Hei hi ramdang nena kan insumdawn tawna atan hmun pawimawh tak a ni dawn a ni.

iii) Food Testing Laboratory:

Ramchhung leh ram pawn a\anga thlai leh ei tur lo lutte hi mihring ei atan a thianghlim tawk em tih lo finfiahna tur bun nan EDF a\angin sum hmuh a ni a, a hmun tur atana building sak zawh vek tawh Thenzawl chu tui leh eng (electricity) lakluhnaah harsatna a la awm hrih avang leh food testing atana bungraw manto tak tak ramdang a\anga chah luhte chu a chhiat palh hlauhthawna avangin tunah hian Zemabawka Drug Testing Laboratory hmunah Health & FW Department-in hmun min pekah lo bun (install) lailawk tura ruahman a ni a, hun rei loteah kan thlai state pawn a\anga lakluh leh hmawmsawm tam tak ramchhung leh khawchhak a\anga lo lutte hi mihring ei tlak a ni reng em tih finfiah theih a ni thuai dawn ta a, kan State tan hian malsawmna ropui tak turte zinga mi a ni dawn a ni.

India Sorkar laipuiin kum eng emaw liam ta a\anga a lo buaipui tawh Look East Policy chu tunah hian a tak ram a thlen chhoh mek tak avang hian 'Act East Policy' tia hming thlakin hma a la chho mek a, chutah chuan Mizoram hi he Policy hlawhtlin chhoh zelna atan hmun pawimawh takah kan awm hi malsawmna ropui tak a ni chho mek a ni. Chuvang chuan ramri tlawh pawh turin kawngpui sial hna thawh mek zel a ni a, khawchhak ramte nen insumdawn tawna atan hmasawmna ruhrel dinna tur hi Sorkar laipui hian minrawn pe zel dawn ni pawhin a lang.

Mizoram chhung, ramri hrul khaw \henkhatte leh Myanmar ramchhunga khaw \henkhat awlsam zawka an insumdawn tawna atan 'Border Haat' dinna tur khaw 4 (pali) chu thlan fel a ni tawh a chungte chu- Hnahlan, Zote, Vaphai leh Sangau/Pangkua

te an ni a, Bazar Ni bik siamin ramri hrula khuate an insumdawn tawna bazar a awm dawn a ni. Chutiang chiah chuan Myanmar ram lamah pawh chuting bazar chu a awm ve bawk ang a, heng khaw chheh vel hian man tlawm zawkin an insumdawn tawn thei dawn a ni. He Border Haat dinna tur ram hi Department chuan a thlang fel tawh a, Sorkar laipui a\anga sum hmuh a nih veleh a sak hna \an nghal tur a ni dawn a ni.

Export Development lama kan hmasawna hi a tak ram a lo thlen hunah ram leilung fate hian a zar kan zo theih nan tun a\anga kan inbuatsaih a \ul. Sorkarin dan leh hrai zawm tur a siam ngei dawn a, dan hnuaiah sumdawnna thianghlim a kalpui theih dawn, hnamdangten zofate thal ai min thal khalh lohna tur chuan keimahni lam kan lo inbuatsaih lawk a \ul dawn a ni.

Industry Meichher
Apr-Jun, 2018